



Služba za društvene djelatnosti

Izveštaj sa 11. (jedanaeste) sjednice Općinskog vijeća Ilijaš

Jedanaesti put od konstituisanja, danas (26. septembra 2013. godine) zasjedalo je Općinsko vijeće Ilijaš. Na dnevnom redu našlo se 18 tačaka po kojim su se vijećnici izjašnjavali.

Svih 18 tačaka dnevnog reda su jednoglasno usvojene. Nakon vijećničkih pitanja, usvojen je Izveštaj o izvršenju budžeta za period 01.01. – 30.06.2013. godine sa izvještajem o korištenju tekuće budžetske rezerve za isti period.

Na trećoj tački dnevnog reda našao se Prijedlog izmjena i dopuna Budžeta Općine Ilijaš za 2013. godinu. Pomoćnica načelnika za privredu i finansije Općine Ilijaš istakla je da je pravni osnov za donošenje Odluke o Izmjenama i dopunama Budžeta Općine Ilijaš utvrđen u Zakonu o proračunima-budžetima u Federaciji Bosne i Hercegovine. Kako je došlo do promjena u izvršenju prihoda i primitaka, odnosno rashoda i izdataka u odnosu na plan Budžeta Općine Ilijaš za 2013. godinu, te procjena izvršenja do kraja godine, potrebno je u skladu sa odredbama Zakona o budžetima u FBiH izvršiti uravnoteženje prihoda i rashoda Budžeta, odnosno donijeti izmjene i dopune Budžeta, kako bi se rashodi i izdaci doveli na nivo raspoloživih prihoda i primitaka.

Izmjenama i dopunama Budžeta Općine Ilijaš za 2013. godinu utvrđen je ukupan prihod u iznosu od 9.970.800,00 KM što u odnosu na osnovni plan predstavlja povećanje za 6% ili 559.000,00KM. Ukupno projiciran rashodi i izdaci u prijedlogu Izmjena i dopuna Budžeta za 2013. godinu iznose 9.970.800,00 KM, što je za 6% više u odnosu na osnovni plan. Načelnik općine se također obratio vijećnicima i prisutnim te dao određena pojašnjenja oko Izmjena i dopuna Budžeta, istakavši da su prioritet Općine projekti koji su započeti i planirani kroz Budžet, te da je jasno da će Budžet na kraju godine biti u deficitu. Pojasnio je da su ovi projekti uglavnom sufinansirani sredstvima kantonalnog i federalnog Budžeta i izvršenje će biti uslovljeno izvršenjem budžeta viših nivoa vlasti. Bez obzira na izvršenje ovih budžeta, Općinski načelnik vjeruje da će sva planirana sredstva biti doznačena Općini Ilijaš najdalje u prvom kvartalu 2014.godine.

Nakon izlaganja Pomoćnice i Načelnika većinom glasova su usvojene Izmjene i dopune Budžeta za 2013. godinu.

Kompletan tekst Izmjena i dopuna Budžeta Općine Ilijaš možete pogledati u kategoriji Materijali za Općinsko vijeće na web stranici Općine Ilijaš.

U nastavku zasijedanja jednoglasno je usvojen i Prijedlog Plana stipendiranja izuzetno nadarenih učenika u srednjem i studenata u visokoškolskom obrazovanju u školskoj 2013/14. godini i Prijedlog Plana stipendiranja učenika u u srednjem i studenata u visokoškolskom obrazovanju u stanju socijalne potrebe u školskoj 2013/14. godini.

Ovim Planovima je predviđeno stipendiranje 43 izuzetno nadarena učenika i 63 izuzetno nadarena studenta, te 23 učenika i 20 studenata u stanju socijalne potrebe. Planovi su koncipirani u skladu sa raspoloživim mogućnostima Budžeta Općine Ilijaš.

Također vijećnici su usvojili i Odluku o sufinansiranju projekta deminiranja Brezik 5.

Ovom Odlukom odobravaju se sredstva u iznosu od 5.000,00 KM Humanitarnoj organizaciji INTERSOS ORGANIZZAZIONE UMANITARIA PER L'EMERGENZA sa sjedištem u Sarajevu koja će izvršiti deminiranje-čišćenje projekta Brezik 5 prema projektu Centra za uklanjanje mina.

Usvojena je Odluka o prestanku statusa nepokretnosti u općoj upotrebi. Naime, radi se o postupku rješavanja imovinsko pravnih odnosa na zemljištu za izgradnju pristupnog puta Industrijske zone "Luke" Ilijaš utvrđeno je da je dio zemljišta Javno dobro. Donošenjem regulacionog plana naselje "Luke", utvrđena je trasa pristupnog puta odnosno glavna saobraćajnica prema industrijskoj zoni i time je predmetno zemljište izgubilo status Javnog dobra te prešlo u građevinsko zemljište pristupnog puta.

Većinom glasova donesena je Odluka o utvrđivanju novog građevinskog zemljišta i plana parcelacije za izgradnju apartmanskog naselja Popovići. Apartmansko naselje se sastoji od:

Prostor parka - sportsko-rekreativnog karaktera

Prostor naselja - rezidencijalno-rekreativnog karaktera koje čine:

- parcele vikend kuća,
- parcele javnih objekata,
- sport i rekreacija,
- ~ kolske saobraćajnice sa trotoarima.

Jednoglasno su usvojene i Odluke o najboljoj ponudi za prodaju jednoiposobnog stana u ul. 126 Ilijaške brigade br. 3 u Ilijašu kao i Odluka o najboljoj ponudi za prodaju garaže u ul. 126. Ilijaške brigade br. 10 u Ilijašu.

Usvojeni su Prijedlozi rješenja o razrješenju i imenovanju članova određenih komisija, koje je podržala Komisija za izbor i imenovanja. Izmjene su sljedeće:

Drugostepena stručna komisija – razrješeni su dužnosti zamjenika predsjednika Drugostepene stručne komisije Ferid Žuga, na zahtjev Općinskog odbora SDP Ilijaš i Fadil Beganović-član Komisije, na zahtjev Općinskog odbora SDA Ilijaša, a imenovani su Safet Stomornjak kao predstavnik SDP za zamjenika predsjednika Drugostepene stručne komisije i Edin Osmanović - član kao predstavnik SDA.

Komisija za zdravstvo, informisanje, socijalna i vjerska pitanja – razrješen dužnosti Jasmin Ombašić, na zahtjev Općinskog odbora SDP-a Ilijaš, a imenovan na dužnost Hamdo Žero kao predstavnik SDP-a.

Usvojen je i niz Prijedloga rješenja iz imovinsko-pravne oblasti koja su se odnosila na utvrđivanje javnog interesa, kao i Saglasnost da se na zemljištu Podgora izvrši ispravka upisa prava raspolaganja, tako što će se brisati Općina Ilijaš kao nosilac prava raspolaganja upisana u "B" vlasničkom listu a u "C" teretnom listu uspostaviti zemljišnoknjižno stanje koje je predhodilo izuzimanju naprijed navedenog zemljišta.

Na 17. tački dnevnog reda našao se Izvještaj o realizaciji Manifestacije kulture, sporta i trgovine "Ilijaški dani 2013". Iz Organizacionog odbora Manifestacije istakli su da je Manifestacija uspješno realizovana, bezbjednosna situacija je bila na nivou, mišljenja građana su pozitivna. Sva kulturna dešavanja su se održavala na bini koja je bila postavljena u Pješačkoj zoni, koja je tih dana bila centar zbivanja. Iako finansijski efekat nije bio kao prethodnih godina u Organizacionom odboru su zadovoljni postignutim. Od strane vijećnika upućeni su određeni prijedlozi, sugestije i kritike kako bi se Manifestacija u narednom periodu tehnički i sadržajno unaprijedila. Sa 18 glasova ZA i 7 uzdržanih usvojena je i Odluka o utrošku dobiti Manifestacije kulture, sporta i trgovine "Ilijaški dani 2013".

Ovim je iscrpljen dnevni red 11.sjednice Općinskog vijeća Ilijaš. Sjednica je završena u 12,10 sati.

Ul. 126. Ilijaške brigade br. 6, 71380 Ilijaš
Tel. ++387 33 580-620, 580-690, fax. 400-505,
Transakcijski račun kod VAKUFSKE BANKE,d.d. Sarajevo:160200000710645
e-mail o_ilijas@bih.net.ba



Broj certifikata:CR14625Q